

पि॒ञ्चत्ये॒ता वा॒ऽएका॒ आप॒स्ता ए॒वैतत्स॒म्भर॑ति ॥ १८ ॥ अ॒थ प॒यो गृ॒ह्णाति । जन॒भूत॒ स्थ रा॒ष्ट्रदा॒ राष्ट्र॒ मे दत्त॒ स्वा॒हा जन॒भूत॒ स्थ रा॒ष्ट्रदा॒ राष्ट्र॒ममु॒ष्मै दत्ते॒ति ता॒भि॒रभि॒षिञ्च॑ति प॒शुभि॒रे॒वैन॑मे॒तद॒भि॒षिञ्च॑त्ये॒ता वा॒ऽएका॒ आप॒स्ता ए॒वैतत्स॒म्भर॑ति ॥ १९ ॥ अ॒थ घृ॒तं गृ॒ह्णाति । वि॒श्वभू॒त स्थ रा॒ष्ट्रदा॒ राष्ट्र॒ मे दत्त॒ स्वा॒हा वि॒श्वभू॒त स्थ रा॒ष्ट्रदा॒ राष्ट्र॒ममु॒ष्मै दत्ते॒ति ता॒भि॒रभि॒षिञ्च॑ति प॒शूना॒मे॒वैन॑मे॒तद्र॒सेना॒भि॒षिञ्च॑त्ये॒ता वा॒ऽएका॒ आप॒स्ता ए॒वैतत्स॒म्भर॑ति ॥ २० ॥ अ॒थ म॒रीचीः । अ॒ञ्जलि॒ना सं॒गृ॒ह्यापि॑सृ॒जत्या॒पः स्वरा॒ज स्थ रा॒ष्ट्रदा॒ राष्ट्र॒ममु॒ष्मै दत्ते॒त्येता॒ वा॒ऽआ॒पः स्वरा॒जो य॒न्म॒रीच॑य॒स्ता य॒त्स्य॒न्दत्त॑ऽइ॒वान्यो॑ऽन्य॒स्या ए॒वैत॒द्विया॑ऽअ॒तिष्ठ॑माना उत्तराधरा॒इव॒ भव॑न्त्यो य॒न्ति स्वा॒राज्य॑मे॒वास्मि॑न्ने॒तद्वा॒त्येता॒ वा॒ऽएका॒ आप॒स्ता ए॒वैतत्स॒म्भर॑ति ॥ २१ ॥ ता वा॒ऽए॒ताः । स॒प्तद॑शा॒पः स॒म्भर॑ति स॒प्तद॑शो वै प्र॒जाप॑तिः प्र॒जाप॑तिर्य॒ज्ञस्त॒स्मात्स॒प्तद॑शा॒पः स॒म्भर॑ति ॥ २२ ॥ षोड॑श ता आ॒पो या॒ अभि॑जुहोति । षोड॑शा॒हुती॑र्जुहोति ता द्वा॒त्रिंश॑द्व॒यीषु॒ न जु॑होति सार॒स्वती॒षु च म॒रीचि॒षु च ता॒श्चतु॑स्त्रिं॒शच्च॒यस्त्रिं॒शद्वै॒ देवाः॒ प्रजा॑पतिश्चतुस्त्रिं॒शस्त॒देनं॑ प्र॒जाप॑तिं करोति ॥ २३ ॥ अ॒थ य॒दुवा॒हुत्वा॒ गृ॒ह्णाति । व॒ज्रो वा॒ऽआ॒ज्यं व॒ज्रेणै॒वैतदा॒ज्येन॑ स्पृ॒त्वा स्पृ॒त्वा स्वी॒कृत्य॑ गृ॒ह्णाति ॥ २४ ॥ अ॒थ य॒त्सार॑स्वती॒षु न जु॑होति । वा॒ग्वै स॒रस्व॑ती व॒ज्र आ॒ज्यं ने॒द्वज्रे॑णा॒ज्येन॑ वा॒च७ हि॒न॒सान्ती॑ति त॒स्मात्सार॑स्वती॒षु न जु॑होति ॥ २५ ॥ अ॒थ य॒न्म॒रीचि॒षु न जु॑होति । ने॒द॒न॒द्वैता॒माहु॑तिं जु॒ह्वानी॑ति त॒स्मान्म॒रीचि॒षु न जु॑होति ॥ २६ ॥ ताः सा॒र्धमौ॒दुम्ब॑रे पा॒त्रे स॒मव॑नयति । म॒धुम॑तीर्म॒धुम॑तीभिः पृ॒च्य॒न्तामि॑ति र॒सव॑ती र॒सव॑तीभिः पृ॒च्य॒न्तामि॑त्ये॒वैतदा॑ह म॒हि क्ष॑त्रं क्ष॒त्रिया॑य व॒न्वा॒ना इति॑ त॒त्परो॑ऽक्षं क्ष॑त्रं य॒जमा॑नायाशिष॒माशा॑स्ते यदा॑ह म॒हि क्ष॑त्रं क्ष॒त्रिया॑य व॒न्वा॒ना इति॑ ॥ २७ ॥ ता अ॒ग्रेण॑ मै॒त्रावरु॑णस्य धि॒क्ष्य७ सा॒दय॑ति । अ॒नाधृ॑ष्टाः सी॒दत॑ स॒हो॒जस॑ इत्य॒नाधृ॑ष्टाः सी॒दत॑ र॒क्षोभि॑रित्ये॒वैतदा॑ह स॒हो॒जस॑ इति॑ स॒वीर्या॑ इ॒